

unaunu Rehana lo enkawl bik deu kha a na, hi taka hin inkhomna ding in ei hlua, voisun chen hin ei lan khom thei zing, ei inhlua tak hi Kakrola mor a um ni loin, Hari vihar a um an leiin, ei Headmistress Pi Grace in a hming thleng a rawt a, inthuruol takin Hari vihar ei ti el a nih. Hi laia kohran hi nuom angin an inthrang duok duok nawa chun, Pathien zar chau-in chanchinthra ngaithla ding mi an la um zing baka, baptistma chang thar khom an um pei, a sunga chenghai hi inhlua a um an ni leiin a thlangpui thuin an det bek bek nawa, sienkhom hienglai zing hin ringtu thra tak tak chu an um ve a beisei na le nasatakin thrang ei lak zing a nih.

A hma khan hi lai hmuna inkhomna hin Pathien ni zat zantieng dar 3:00 a inkhom hlak ei na, sienkhom Shivvihara Pathienni chawibiekin inkhom voihni ei nei hlak leiin, a remchang lem dinga ei ring bok leiin Inrinni (Saturday) zantieng dar 3:00 zatin inkhomna hi nei a ni ve thung, voisun chen hin Inrinni a inkhom hi ei la sun zawm zing a nih, Chuonglai zing chun Pathienni zantieng zatin Naupang Sunday school nei a ni vet hung.

Hari vihar naupang Sunday school: Hari vihar ei ti hi, kha hmaa, Kakrola mor ei ti kha a nih, hi taka hin naupang Sunday school regular takin Pathien ni zantieng dar 3:00 in nei pui an ni zie a, Naupang hi mi 20 (sawmhni) vel nei a nih. A mihai hi an mi thar tak tak, an nu le pahai ringtu la ni lo an ni tlangpui leiin, Pathien thu hi a simple thei ang taka inchuktir an nih, Pathien zantieng zatin Tv. Jacob Arya le Shivvihar kohran thralai hai mi pakhat tak thruoin class hi neipui an ni hlak. Pathien thu hrietna baka khawsakna tienga khom an hmasawna hmu theiin a uma thafan an um tak zet.

Kishangarh Hindi service: Ei hriet seng ta angin Kishangarh hi ei ni mihai mani in neia ei um tamna tak a na, hi lai hmuna hin rawngbawl na hi nei thei inla, ei fellowship memberhai khom an thei ang angin rawngbawl na hin thrang hung la hai sien ei ti a hi rawngbawl na hi ei tran a na. Inrinni (Saturday) zingtieng dar 10:00 zatin inkhom hi ei nei hlak a nih. Nuom angin in thrang duok duok naw sienkhom hi Kishangarh Hindi Service a inthok hin mi pakhatin baptistma a chang taa, tu khom hin Baptisma chang ding an um pei a nih. Kum 2022 laia Shivvihara ei lo Baptist ta Mr. Prabakar in nasatakin hma a hung laka, ama hi Rangpuri laia um Airport a sinthaw a nih. A sin thawna baka Rangpuri laia hai Pathien thu hrilin mi a hung thruoi pei a nih. Hmatieng khom Pathien zara hun thra ei hmu an chun
(Phek 09 ah tiem zawm ding)



An Organ of the Hmar Christian Fellowship Delhi

HREPUITU

HREPUITU | VOLUME: XIX | ISSUE: 2 (MAY, 2023)

“Ma loin **trongtrai**
unla, iengkimah lawmthu hril
rop ro”

I Thesalonika 5:17-18



Please visit HCFD official website:
<https://hcfcd.in/>

HREPUITU

Hmar Christian Fellowship Delhi
Chanchinbu Thlakip Suok
(Regd.No.: S/ND/599/2015)
Vol. XIX/No. 2 (May, 2023)

Managing Editor:

Pu Herbert Lalsanglur

Joint Editors:

Pu Rohminglien Songate

Pastor Steven Lalzarzolien

Infimate

Printing/Circulation:

Pu Robert Penatu

Address:

Managing Editor, Hrepuitu,
Fellowship Centre, Basement,
H. No. 57, Munirka, Delhi-
110067

email: hrepuitu@yahoo.com

Hrepuitu a article insuo hai, ngaidân suklanga um (hai) hi HCF Delhi ngaidan a(n) ni chuong kher nawh. Ziektu tin mawphurna a ni lem. Pathien thu le article insuo nuomhai chun iengtiklai khawma editorhai email ah thu ziek hai chu pek thei zing a nih.

- Managing Editor

A SUNGA THU UMHAI

03 EDITORIAL

**05 SUOLNAIN HMUN
INSANG LEM CHANGIN I
NGAI HLAK AM?**

**10 PATHIEN HI INPAK
LE CHAWIMAWI TLAK A
LO VA NI NGEI!**

**12 NANGMA HRIET-
NA RINGAWTA INNGHAT
NAW RAWH**

14 BELHEMTU

**16 REPORT: BETHANY
CONVENT SCHOOL**

17 MISSION RIPAWT

inkhom a ni hlaka, hi taka hin Bible study baka, testimony sharing nei a ni hlaka. Chun trongtraina subject puongin trongtraï ruol nei a ni hlak bok. A thren threnin Pathien ni chawibieka hin bufai thram an hung chawi khom baka, thawleni zan inkhom hin thawlawm an chawi khom bok hla-ka, chuonghai chun kohran sunga damnaw le thrangpui ngaihai an thrangpui hlak. Nuhmei pawl hi Kohrana nasatakin an thaw hlawk baka, kohran sukhlimtu tak khom an nih.

Thralai Pawl: Thralai Pawl hi Kei ka mawphurna deua sie a na, committee sunga hin mawphurna hran hran inruot a nih. Thralai pawl mawphurna tak chu Kohran mipui fe khom huna thaw ding trul hai thaw tu le Pathien worship service a worship thruoi hai hi a nih, Inrinni zantieng zatin Pathien nia hla sak dinghai lo enlawk a ni baka, sharing le trongtraï naa hun hman a ni hlak, thralai hai ta dinga trul le pawimawhai inhril hrietna hun bikhai siem ani hlak bok.

Naupang Sunday School: Naupang Sunday school Pahni ei neia, Shivvihar le Hari Vihar a Pathien ni zat in Naupang Sunday school hi nei a nih.

Shivvihar a Naupang Sunday school: Pathien ni zatin zingtieng dar 10:00 -12:00 sung Sunday worship nei sung hin Naupang Sunday school khom nei a ni zie a, class pathuma inthrein Pathien thu inchuktir an nih. Pathien zarin naupang Sunday school khom hi Lalpan mal a sawma, tuhin naupang regulara kai hming ziek po hi mi 64 an ni a, regular a hung hai hming ziek sa pei a nih. Naupang Sunday school hi pawl pathum in thre a na, pawl tina a hin zirtirtu pahni pei siem a ni bok. A voikhatna a dingin tu kum, Naupang Sunday school a inthok mi pali (4) puithlinga sawn lut an nih.

Naupang Sunday school hi nasataka thrang lak a na, an subject ding hi Pastor pa inrawina hnuaia subject siem a na, zo fel an taa, an inchuk tran zing an tah.

Shivvihar Naupang Sunday school a inchuktirtu dinghai hi Local committee a fiela chuonghai chu.

1. Pi Ruth Remthangmawi, Superintendent. 2. Pi Esther Laltlansuok Amaw, 3. Pi Parminder Maholtra 3. Pi Sonia 4. Nk. Rebecca Arya. 5. Nk. Neetu 6. Nk. Amisha. 7. Tv. Thangliensang zote.

Hari vihar: Hari vihar hi ei hriet thei dan ding chun, kha hmaa ei

chu Pathienni hi voikhat chau inkhom ei nei ta a nih. Pathien ni inkhom baka, Nilai ni zantieng zatin Pastor thruoina hnuoia Bible study nei a ni hlaka, chun Zirtawpni zatin bunghei trawngtrai nei a na, hi ni hin zingtieng dar 9:30 a inthok dar 1 chen hi, rawngbawltuhai po Pastorin Bible study le rawngbawl na trul le pawimawhai trawngtraina hun a mi nei pui hlaka, zantieng dar 2 a inthok dar 5 chen hi Mani in senga bungheia trongtraihai chu biekina inhmu khomin trawngtrai khom a ni hlak bok. Lock downa inthok khan tuktin zing trawngtrai zoom hmangin kan la nei theia, hi taka hin Delhi chau ni loin, ei kohran member hmun dang danga um ta hai khom an hung thrang chang a um hlak.

Ringtharhai in Pathien chanpuol sawma pakhat pekna chang an hung hriet peia, nasatakin kohranin hmu theiin hma a sawn pha a nih, Mani tawk tawk tiin tuhin an sawma pakhat chun Nepala Missionary pakhat enkawl a nih.

Kohran hi mani in enkawl dan inchuktir peiin an na, an hmasawn nawk zuolna ding tiin, Department hran hran siem a na chuonghai chu:

Local committee hi Pastor enkawl na hnuoia sie a na,

Nuhmei pawl hi Pi Grace Khawbung a enkawl a ni bok,

Thralai pawl hi kei Evan Vanlaltlan enkawl na hnuoia um a ni,

Naupang Sunday school hi Pi, Remthangmawi enkawl na hnuoia sie a ni bok.

Local committee: Local committee hi a pumpuia kohran enkawl na mawphurtu tak an na, committee hai lai hin, mawphura dang dang insem a na. Sum le pai baka kohran sunga trul le pawimawhai ngaituo le enkawl chu an sin a nih. Hi committee program siemna hnuoia tuk tin zing trongtrai hi zoom hmangin nei a ni zie a, chu baka Hieng kohran huopa program seminar le Pathien thua kohranhai an inthrang lienna dinga trul le pawimawhai ngaituo tu tak an nih. Tu hin Shivvihar kohran hi Nepal a missionary pakhat thrangpui a na, chu enkawl na sum le pai a trulhai zawngtu tak an nih. Nepal tieng khom, Pathien Lunginsietna zarin ei unaupa Evan Dinesh Kumar fethlengin rongbawl na a fe zing a. Tu kum, tu chen hin mi 18 velin Isu Krista chu an lal le an sandamtu'n an pom a, baptisma khom an chang tawl ta bok a nih.

Nuhmei Pawl: Nuhmei pawl hi Pi, Grace Khawbung enkawl na hnuoia sie a na, Thawle-ni (Tuesday) zangtieng zatin Shivvihara biekina

Editorial

INVET CHU KA VA NI NGEI DE!

“In lungzingna popo ama chungah innghat ro, amân a ngaisak si cheu.” (1 Peter 5:7)

Hi thu hi a ropui em em ngei de! Ienglai hun a khom mi thlathlam ngailo le mi ngaisak hlak tu Pathien ka nei hi vangnei kan ti hle a. A nau mit leng, a dit lai ngawi ngawi le a hmangai em em ka ni tlat si. Iengkimah ka mamaw le thratna ding hai hlak a hriet fai vawng si a. Ka ta dinga tha le trul a ti hai chu a hun takah a mi thaw pek pei hlak bok. Pathien hi chu a lo va tha ngei de aw! 2 Korinth 12:9 a chun “ka lunginsietna i ta dingin a hun tawk...” tiin a mi la hril nawk pei nghal si a. Ama ngeiin a lunginsietna ka ta dingin a hun tawk a mi ti pek tlat leiin zuk ringhla ruol ding chu ni naw top a tih. A hril hi inkhel bok naw nih. An leh iengleia harsatna le beidongna hai ka tuok chang Ama ka bel vat naw hlak am a na? Invet chu ka va ni ngei de!

Ama bel le innghat tlat hi ka tadinga thil thatak chu a lo ni si a. Ka thaw ding reng khom a nih. Nisienlakhom, khawvel mawina, insangna le ropuina hai hin an mi lo hip nasa thei em em hlak si a. Hrietnaw kar in keima ah Pathien nekin hmun an lo hlao insang lem hlak rop el si. Amiruokchu, khawvel mawina, insangna le ropuina popo hin hlimna le muongna tluontling ka beisei le ka zong hlak hai chu an mi pek thei ngai chuong der si nawh. Iengleia ka ta dinga trul le thra mi thaw pek hlak tu Pathien bel nachang ka hriet naw vet hlak am a na? In vet chu ka va ni ngei de!

Thuhriltu 5:10-11 a chun “tangka ngainatu chu tangkaa chun lungawi naw ni a; hlawkna nasatak ngainatu khom chu lungawi bok naw nih... thilhai chu an hung pung chun, a fatuhai khom an hung pung pei a nih...” tiin a mi lo hril a. Pathien thranglo a khawvel mawina, insangna, ropuina le hausakna hai ringawt hin chu hlimna, lawmna le lungawina tak tak an mi lo pek thei ngai der si naw a. Iengleia ama neka khawvel tangka sum le ropuina ka lo thlang lem vet am a na? In vet chu ka va ni ngei de!

Lunginzingna, harsatna, beidongna le mangangna ka tuok chang ni

lem hin chu Pathien chau naw chu tu dang bel ding a lo um nawh ti chieng takin ka hriet ve si a. Mihriemhai in lainatna le in hmangaina hai hin umzie chu a lo nei ve em em. A mi lainat tu le mi hmangai em em tu hai, threnum le ruoltha haiin iemani chen chu an mi hnemin, an mi thlamuon thei ve hlak. Nisienlakhom, a zo zaia mi ngaisak hman thei ding hlak an lo um ngai si nawh. Hadamna le muongna tluontling mi pe thei tu khom an lo ni ngai bok nawh. Iengleia muongna le hadamna indik tak mi pe thei tu Pathien ka bel el hlak naw am a na? In vet chu ka va ni ngei de!

Iengtikam ka tho har ding ana? Iengdinga mi thlathlam ngailo le mi ngaisak zing hlak tu Pathien ka bel tlat hlak naw am ana? Iengdinga Pathien bel zingna chang hre lova hringnun ka hmang vet el hlak am ana? Invet chu ka va ni ngei de!!!

Sawmapakhat le Good Samaritan Fund

Online a Sawmapakhat le thilpek dang dang: Sawmapakhat le thilpek dang dang pe nuom hai chun hi a hnuoi a Hmar Christian Fellowship, Delhi account detail a hin pek thei zing a nih:

Account Number : 91462010038313

IFSC Code : CNRB0019146

Bank Address : Syndicate Bank/Canara Bank, Akbar Bhawan, Ministry of External Affairs Branch, Delhi-110021.

Online baka hin ei chawibiek naa thilpek ei lakkawm huna khawm thilpek dang danghai hih ei pek thei zing a nih. Sawmapakhat le Missionary Fund hi Finance Secretary (Mission), Pu Immanuel Khawbung kuoma lut/pek ding a nih.

Good Samaritan Fund: Chawibiek naah thilpek lak khawm huna pek thei a ni a, chu khela chun Finance Secretary (General), Pu Thanglalmuon Hrangchal kuoma khawm pek thei ani bawk.

MISSION RIPAWT

~Evan Vanlaltlan Amaw



A hmasa takin vawisun chena, A Rongbawlina ding a, kotlien tak a mi la hawng pektu ei Lalpa Isu Krista'n ropuina po po chang sien la; Hmar Christian fellowship Delhi (HCFD) fe thlenga a rongbawl thei dinga a lunginsietna mi'n dongtirtu le hriselna mi petu ei pa Pathien kuoma ka lawmthu ka hril.

Pathien lunginsietna zar chauin tlawmtaka chanchinthra ei hrilhai chu Lalpan mal a sawma, ringthar pek belsa in ei um pei lawm a um tak zet. Delhi le a sevela rawngbawl dan tlangpui chu hieng hi a nih: Pathien zarin kohran memberhai hmangin mi thar Pathien thu hril ding hi an um zinga, ringtharhai hin an sin thawnaa an ruolhai le an u le nauhai chanchinthra an hril peia, chuonghai bawzui chu kan sin tak a nih.

A umzie tak chu, kei ni rawngbawltuhaiin chanchinthra hril ding mi kan va zawng ni loin, ringtharhaiin an ruolhai dam an sunghai dam chanchinthra an lo hrilhai chun an mi ko hlaka chuonghai chu an inah hai fe in Pathien thu kan hril hlak. Pathien zar chauin voisun chen hin nitina chanchinthra hril ding an um zing a nih. Tu hin hieng anga contact hi mi 120 vel an uma, hienghai laia inthok hin mi 45 in Lalpa Isu chu sandamtu a ni ti pawmin Baptist an nit ah.

Delhi sunga Hindi trawnga worship service ei neinahai: Delhi sunga hin regular taka Pathin chawibiek inkhomna hi hmun thuma ei neia chuonghai chu:

1. Shivvihar,
2. Hari vihar (a hmaa kakrola mor ei ti kha) le
3. Kishangarh hai hi an nih,

Shivvihar a inkhomna: Shivvihar hi Delhi hmuna ei rawngbawlina intranna a na, tu hin member hi 300 ei chuong met taa, A hmaa ei inkhomna kha a chin leiin kum hni sung chu Pathien ni zatin voihni ei inkhom hlak a na, Pathienni zat voihni inkhom zie chu kohran haiin a remnaw thu an hril vet hlak bok leiin, Pastor pa le kan ngaituoa ei building chung chu inkhomna dinga siem el dingin kan suk tluka, ni kum March boruok lum hung intran hlim chun ei building chung chu inkhomna dingin kan siem a, tu hin

Report: Bethany Convent School

~Grace Khawbung (Headmistress)

Pathien zarin session thar (2023-24) chu 10th April 2023 khan tran alo ni ta a. Tu china naupang hming ziek ta po 103 an ni tah. A tlangpuiin july chen hin admission thaw ani hlak. Nursery anthok class V chen a uma. .Amiruokchu tu kum hin pawl li a um naw anih. School fee hi thla khat ah 400 ei lak anih.

Teaching staff panga le peon pakhat kan uma. Staff hai hming:
1.Mrs.Grace Khawbung (Headmistress) 2. Mrs.Ruth Remthangmawi
3.Mrs.Parminder kaur 4.Miss Neetu 5.Tv Albert Chongsanglur 6.Mrs.Jaya devi (peon).

Naupang hai hi lekha cho ni loin tuktin Pathien thu le hla hai in- chuktir an nia. Chanchin thra thlai chi tua um hai Lalpan an lungril ah suk hring ngei dingin kohran han trongtrainan lo san zing ei tiu.

Donors: Thrahnemngai mi iemani zatin naupang an hung chawm boka. Chuong hai chu a hnuoi a hai hi annih.

- 1.Dr.Dony Tuolte - Rs. 12000 per month
- 2.Nuhmei Pawl - naupang pathum
- 3.Pi Niangboi Pudaite - naupang pakhat
- 4.Pu Cliff Hekte - Naupang pakhat
- 5.Pu Immanuel khawbung - Naupang pakhat
- 6.Tv. Laldawmsang - Naupang pakhat
- 7.Pi Lalromawi Songate - Naupang pakhat, uniform le lekhabu thrang sa in.

An chungah ei lawm bek bek anih. Pathienin a let tamin taksa le thlarau ah malsawm seng raw se.Naupang sponsor nuom hai ta dingin kot an hong zing anih.

Naupang a hung kai hai po poin sandamna an chang seng theina ding le zirtirtu hai khoma Pathien dit dan ang taka kan zirtir theina dingin kohran han trongtraina in milo san zing ro.

SUOLNAIN HMUN INSANG LEM CHANGIN

I NGAI HLA KAM?

~Chonghoikim Inbuon



August 2022 anthawk April 2023 sung po khan
“**People of the Promise: Kingdom Divided**” ti thu- p u i a
hmangin zawlnei hai lekhabu ziek bu 15 kan bie char char a, chuong hai lai chun zawlnei Habakuk lekhabu ziek chite nisi inchuk ding tamtak um hin ka lungril a lak khawp ela, mi dang khawmin lo tiem ve hai sien la, lo hre ve hai sien ti nuomna leiin hi article hi ka hung ziek a nih.

Zawlnei Habakuk hi Juda ram a Pathien zawlnei ani a, Babu- lon sal intang hma zawlnei a tawp- na tak ani nghe nghe. Kum 612-588 B.C lai vela ziek a nih. Suitu hai chun, zawlnei ni sien la khawm Ha- bakuk hi Pathien tempul ah thiempu sin thaw hlak niin an hril.

Israel lal ropuitak le vartak Lal Solomonin pathien dang tam tak a bieka, Pathien hring a uiret san leiin Lalpa’n Israel lalram chu pahni in a khoia. Sak tieng (North- ern kingdom) kha Jeroboam, Nabat naupa kut ah a pek a, Israel pahn- am (tribes) sawm a kutah a sie tah ani, chu lalram chu Israel lalram tiin anko. Ei Pathien a thutiema ringum le hmangaina a sip chun, Lal Da- vid kuoma a thutiem lei le, khawvel po po sandamna lampui a riruong lei khan, thlang tieng (Southern kingdom) kha lal Solomon a nau- pa Rehoboam kutah a pek a, chu

lalram chu Juda lalram tiin an koa, Israel pahn- am (tribes) pahni an um. Saktieng lalram a khan, Assuria sal intang hma chen khan lal 19 in ro an hung rel suk peia, amiruok chu lal pakhat khawm Pathien tri le inza anlo um der nawh. Thlang tieng lal- ram a khan, Babulon sal intang hma chen khan lal 20 in ro an hung rel suka, lal threnkhat, thlawmte chun Pathien ditzawng anthaw a, a tam lem chun Pathien trina le inzana an nei nawh. Lalram pahni hai ei en chun, Israel lalram a khan sungkuo le thlaa (dynasty) dang dang in ro an rel a, Juda lalram a ruok chun lal Davida a sungkuo le thlaa (Da- vidic dynasty) kha tan loin a fe suk pei a, Isu khawvel Sandamtu, Dav- ida Naupa a hung peng ani. Pathien thilthawtheina le ringumna in a suk- puitling a nih. Pathien chu inpak- in um raw se!!!

Leh, ei topic ah lut ta inla,

Juda lalram kha suolna a pung deu deua, lal threnkhatin hartharna (re-vival) an hung thruoi hlaka chu sawt dei ngailo, suolna kha re nekin a pung zuol peia, milem biekna nasa taka pungin Jerusalem khawpui sung lampui kil tina hai nileh, hmun insanga hai milem biekna hmun an inchang zo tah a ni. Milem hmaah nau hai hringna inhlana hai chen khawm anlo thaw a, hmeithai le pa neilohai ngaisak lona le hnawchep-na dam, midang in le lo indiklo taka lakpek dam, manin inhoi anti phot le ngaimuong taka umna dam, thil le hlaw dit taluo dam, zawlnei tehlem le thiempu indiklo hai ring le zui nuomna dam, suol chi dang dang khan a chim hne ta hle a. Chuong ang mipui le lal hai suolna chu a ennin zawlnei Habakuk chu a bei a donga, a ning antel a, Pathien to veng veng angai lei khan a hriet-thiem thei nawh a, Pathien kuomah chun a khek suok tah ani. **“Ieng chen hiel am aw Lalpa, thrangpui ngena ka kona hi, ngaithla loin I um ding ana? “Inpawngnekna!” ti’n ka khek a, mi san suok di’n I hung si nawh. Ieng leiin am thil indik lo, I mi’n hmutir zing am a na? Ieng leia thil poi I ngai thei am? Sietna le inpawngneknahai ka hma ah ka hmu zing a. Inng-hirngghona le inkhahna a tam. Danin kong ro a suk ta naw a, in-**

diknan hmun a chang ta nawh. Mi suolin mi fel an inhuol a, indikna a lutinle zo tah.” Habakuk 1:2-4

Zawlnei Habakuk hun lai leh ei hun tawng mek hi an inangna a tam hle. Suol pung zie leh mihriem khawhlo zie an ang. Indiknawna, inpuongnekna, innghirngghona le inkhakna nasat zie an ang. Mithra hnawchep in an uma, misuol an in-thrang duok duok. Habakuk ang khan Pathien hi to trok trok a, suol a ngaitha anga ei ngai chang a um hlak. Ana chu alo ni le! **Lalpa chun ieng tinam Habakuk chu a don na?** Chang 5-11 ei en chun, Lalpan a thaw ding a lungrilah alo siem heu tah ei hmu. Habakuk damlai ngeia a thiltum a thaw ngei ding zie Pathienin a hril baw. Pathien thil tum chu min hril hai sien khawm Habakuk in a awinaw ding thu khawm a hril. **Pathien thil tum chu iem ana leh?** Pathien thil tum chu Babulon hai, hnam tawrot le dawn tawi tak, mi trisim le pangzat kaihai (Habakuk 1:6-7) hmangruo ah hmanga Juda hai hrem tum a lo ni zing. Ava mak nawk ta de maw Pathiem remruot dan chu! Pathien remruot dan hai hi chang chun ei hrietthiemna khel tieng dei alo ni hlak. Pathien to trok trok a anlang khawm in, iengkim alo hriet a, ei hriet phaklo in rem thra tak a lo ruot hlak a ni.

ma kir hai chu hrem dinga thu a lo tiem tah khom lo nisien a hma neka mawi le thra a siem dingin an pei zing anih.

Voisun hin Lalpan mi hem thrat a nuoma, mi hmang a nuoma,

taksa le thlarau ah malsawm na tam-tak mi pek a nuoma, chu ding chun Lalpan a ko che a, nang in pei am? Lalpan hraw dinga a ti lam chu i thlang ding am?

TUOLSUNG CHANCHIN

Missionary Sunday

Liem tah April ni 23, 2023 khan Missionary Sunday ropui taka hmang ani a. Hi huna hin hun iemani chena inthoka missionary dinga Pathien kona hre a lo inpe tah Tv. Paozamuan chu missionary dinga hunser (missionary commissioning) chu nei a a nih. Hi hunser hih Upa Dr. Lalsiemlien Pulamte in a nei. A thratlai le a vanglai taka Pathien ta dinga an pekna hih a ropui takzeta, thlarau bohman tamtak sansuoktu dingin Lalpan a hmangruoah hmang ngei sien tiin ditsakna ei inhlan nghal bok a nih. Hi ni vek hin Shiv Vihar thralai pawlhai chun Pathien inpakna hlapawl thiem takin an inhlan. Ei missionary ditum tak tak Evan Vanlaltlan Amaw le Pi Grace Khawbung haia inthawkin mission report le pathien thucha ropui tak tak ngaithlak a ni a, a ropui takzet.

Hi huna baw. hin HCFD Vengbuk popo a inthawka thruoituh thlang thara umhai (2023-2025) ta dinga trongtraipekna pastor Lalditsak Inbuon in a nei baw.

Munirka Vengbuk Fund Drive

Chanchin ei lo hriet dan chun tulai hin HCFD Munirka Vengbuk chun vengbuk le kohrana an rawngbawlna le inzawma an hmang dingin secondhand bale (Boxer) hawngin fund drive an nei meka, chu baka chun in tin kan suok tumin April thla tawp tienga inthawk khan thruoituhaiin hma an lak mek. Munirka hih Delhi khawpui sunga ding chun ei um bum tamna tak khawm ni dingin ring a uma, hieng anga vengbuk thruoituhaiin an memberhai kana inhmelhriet pui le trongtraipekna an nei hlak hih a ropui ei ti takzeta, thruoituhai Lalpa’n malsawmin suk hrat pei rawsen.

BELHEMTU
~Grace Khawbung



Lalpa thu chu Jeremia kiomah a hung tlung a, “Tho la, belhemtu kuomah zu fe la, chu taka chun ka thu hai inhrietir ka ti che” a ta. Belhemtu inah chun ka zu fe a, a bel siemna kawlah sin a lo thaw a. Pilpoka bel a siem lai chu a kuta a tawk siet pal pha a pilpok bok chu hmangin thra ati dan ang takin bel dangin a siem nawk pei a (Jeremia 18: 1-4).

23rd April 2023 khan HCFD chun Missionary Sunday ei hman-ga. Hi lai thu hi tawiten kalo hril ta a. Hun a um tanaw leiin ti angin ka hril hman tanaw a. Voisun hin ziek thiemlo tak pumin ka la hei sunzom nawk tum anih.

Mihriemin thil a sie hnung ei siem thra (repair) nawk reng rengin a thar anga thra in ei siem thei ta ngainaw a. Abiekin electronics thil hai lem hi chu a thra tak tak thei ta ngai naw a. A thren lem chu pei hawn top a trul hlaka. A chung a ei Pathien thu hang tar lang hi ei en chun, hi taka belhemtupa ruok hin chu a sie ta hnung khom a dit dan ang takin a hma neka thrain a siem nawk pei thei a. Hi taka belhemtupa kuta pilpok hai ang hi ei nih.

Belhemtupa ang hin Lalpan a sie ta hnung eini hai hi a dit dan ang taka thrain ami siem nawk thei a, ami siem nuom bok anih.

Ei thlatu Adam le Evi in dan an bawsiet leiin mihriem po

po trongsie phurin ei uma. Chatuon thina chang ding le Pathien lungsen-na tuor ding hrina pieng ei lo nia. Amiruokchu Pathienin a lungin-sietna nasatak leiin Isu Krista ah mi tharin ami siem thra nawk a. A nau ni dingin ami thlang a. Amiruokchu Pathien lunginsietna in nghil-in ei nuom dan ang takin nun ei lo hmang nawk hlaka. Chuongsa khom chun mi siem thra nawk dingin ami la dit zinga. Voisun hin Pathien leh kar hlataka um khom ei lo ni ta thei, kohran laia inlang ngam talo khop hiela suola pil khom ei ni ta thei, Lalpa ta dinga trangkaina nei thrak lo khom ei ni thei, anachu Lalpan siemthra dingin ami la dit zinga, tu el hin, voisun hin mi siem thra a mi hmang a nuom zing anih.

Amiruokchu Pathienin tukhom a force ngai naw a. Ei chang thlang Jeremia 18; 5-11 khi ei hang tiem pei chun Lalpan sim nuomnaw tu hai chu a thaw lui ngainaw a. Sim a, a kuom tieng siemthrat nawk nuo-

Zawlnei Habakuk chun mi suolhai hrem dinga anni neka suol lemhai Pathienin a ruot chu a hriet thiem thei naw em em a, Pathien kuoma chun **“Aw Lalpa, I rorelna hlen dinga, anni chu I ruot an na. Keini mi hremtu dinga I ruot an nih, Aw Lungpui. Thil thranaw enna dingin, I mit a thienghlim taluo a, thil thranaw I ngai thei nawh. Chuong chu ni siin ieng dinga, dawhaa che hlak mihai hi I ngai thei tawl am a na? Mi rilohai-in mi felhai an lem zo duok duok lai khan, ieng dinga I to zing am?”** (Vs 12b – 13) ti in Pathien chu an don nawk a. Thra ka zuk ti em em chu Habakuk hin a lungril a thil um hai, a hrietthiem naw hai tu bulah khawm in tlun lo in Pathien kuomah an tlun hlak hi a nih. **Nangin teh tum I pan hmasatak hlak harsana hunah? Ruol thra hai I pan hmasa hlak am? Nu le pa? Pathien?** Thra kati nawk pakhat chu, Habakuk in a lung zingna hai Pathien kuoma an zawt zo khan ralveng bukah kai in, kul chungah Lalpa donna chu a ngahak ani. Pathien a biek chun, a hung biek kir ngei ding beiseiin, zangaitakin Lalpa rawl chu a nghak anih. (2:1). **Pathien donna ei nghak hlak am le? Annaw leh, ei maning ning ah hma ei lak hlak am?**

Pathien in Habakuk chu a

hung biek nawk ta ngeia, inlarna thu a pek kha lungah siek a tlangsam hai in an tlan pui pha fie kunga hmu thei anina dingin a hril tah a nih. (Habakuk 2:3) **“Inlarna hi tlung nghal naw nih, a tlung hunbi ding ruot a na, inkhel loin tlung ngei a tih. A muong khomin nghak el rawh, matheiloin hung tlung a ta, hun sawt tak riel ta naw nih.”**, ti in Lalpa’n chieng takin a hril. Lalpa to trok trok a sawn kha alo to trok trok naw kher el. Iengkim rem alo ruot vawng an ta. A hunbi hai khawm alo ruot vawng an tah. Inkhel lo in tlung ngei bawk a tih. Pathien nin suol hremloin a sie ngai der nawh. Ama hunbi ah a hrem hlak a nih. Pathien hunbi hung tlung hma hin, mihriem hai hin chihni in hringnun ei khal hlak. Vs. 4 Pathien hrelo hai chun chapo takin hringnun an khal hlaka, mi fel, Pathien nau hai ruok chu ringnain an hring hlak a nih. Mani chit in enfel ei tiu. Vs 5-20 hin Pathien in Babulon maw anphurtir ding thu chieng takin zawlnei Habakuk alo in hmutir. An suol ang chara Lalpa’n a thungkir ngei ding zie alo tarlang. Lalpa lungsen na no a kut chang tieng a chel kha Babulon chung a chun a thla ngei ding anizie alo hmu hlawk. Ei Lalpa Pathien chu iengkim chung a rorelu anih, a tempul thienghlima chun Lalpa chu a cheng a nih. (Habakuk 2:20)

Habakuk 3 ah Lalpa don-na chieng taka a hung tlung chun, Habakuk chu Pathien hmabulah a trawngtraï tah a, Pathien lo ringum zie le a thilthaw ropui tak hai ngaituo in, ama hun ngei a khawm thil mak le rapum hai thaw nawk ngei dingin a ngen tah anih. Beidongna hmunah hai hin Pathien lo thratzie hai ei ngaituo kir chun beiseina le hratna ami pek hlak. **Lalpa i chunga a lo thratzie ieng ieng am I ngaituo kir thei a?**

Pathien hremna hung tlung ding chu hawphur a um hle a, Babulon sepaï hai chu keite neka tuongrang lem anni a (1:8), Habakuk chu a tri hle bawk anih. Habakuk 3:16 a hin a trit zie Pathien kuomah anzawt ani. Tri in a hmur an lap dor dor a, a ruhai a moi zo a, a ke hai anthin hlop hlop a. Chuong lai zing chun Pathien Habakuk kuoma alo inpuong lei khan (Habakuk 3:3-15), Habakuk chun beisei takin, runtu hnamhai chunga sietna Pathienin an tlungtir ding chu nghakhla takin a thlir ta lem anih. Habakuk chu tri hle sien khawm Lalpa thuthlukna siema chun an tuklut ta tlat anih. Lalpa ah chun a nghata, a lawm thei tlat a nih. Vs. 17-19 a hin Pathien anpaka, Lalpa ah a lung awi le, a lawm thu an zawt a nih. Chang inlar tak le mitin nin ei dit chang hi Habakuk chun alo

samsuok a nih. **“Theichangin ra insuo loin, grep hruin ra insuo loin, oliv kungin ra insuo loin, loin bu thar insuo loin, beram huonga inlawi um loin, bawng in ruok khom ni sien la, Lalpa ah hlim pei ka ta, mi sandamtu Pathien a chun ka lawm pei ding ani si a. Lalpa Pathien chu ka hratna, zukpu anga ka ke sukhrattu, hmun sanga min tlattirtu a nih.”**

An hmabak chu thina, trapna, tram, sal a thruoi hmang, pasiet tawp khawm nisien khawm Habakuk chu Lalpa ah a lawm thei ani. “Lawmna” eiti hi ei sie le vel a him lei le hun inhoi ei pal lei ni loin, Pathien anthawk lawmna a nih. Habakuk khawm khan hun sawtnaw te a, hmelma ha’n an hung run ding ti a hriet, a miruok chu Pathien Thu tiem a hung tlung ngei ding a ring leiin, Pathien thuthlukna ah intuklut in, Pathien ah lawm kati ati thei anih. “Ami Sandamtu Lalpaah chun lawm ka tih” tiin Habakuk chun lungril (decision) a lo siem a ni. Einin teh? Hieng ang decision siem hi nang le kei kuta innghat ani ve tlat a ni. Naupang school fees pek theinaw chang khawm, office kaina ding Kalman neinaw chang khawm, medical report/blood test report thratnaw lai khawm, nau haiin duthusam anga thu anawinaw chang khawm, an

mihriem ngaituonain a phâk chin khêl tienga inthawkin hlawtlingna mak tak a hung inlang chau hlak châng khawm a um ding a ni tî hi ring ngam ei tîu.

“Pathien ka ring, Pathien-ah iengkim ka’n nghat” ieng angin hei ti de inla khawm, harsatna ei tuok hunah ei bei a dawng nâwk nghâl el si chun, Pathien-ah ei la’n nghat ngam tak tak naw tîna ni’ng a tih. Mihriem ei nî leiin beidawng naw

thei lem chu ei ni nawh; amiruo-kchu Pathien-a beiseina ruok chu beidawng tak pum khawmin beisei tak sia nghâk fan fan ding hi ei nih. Beidawng zing pum khawma ng-hâk hrâm hrâmtuhai chu Lalpa’n a thlâwnin inkîrtir ngai naw nih. Lalpa chu lâinatna le hmangainaa sip, mi hlêm hmang a ni si naw a.

Lalpa’n a thû ei suklanghai chu tûl le t̃ha a tî ang takin mal mi sâwmpêk raw seh.

QUOTES

“I have so much to do that I shall spend the first three hours in prayer.”

— Martin Luther

“God has given us two hands, one to receive with and the other to give with.”

— Billy Graham

“We are products of our past, but we don’t have to be prisoners of it.”

— Rick Warren

“God can’t give us peace and happiness apart from Himself because there is no such thing.”

— C.S Lewis

“In prayer it is better to have a heart without words than words without a heart.”

— John Bunyan

“Nothing binds me to my Lord like a strong belief in His changeless love.”

— Charles H. Spurgeon

NANGMA HRIETNA RINGAWTA INNGHAT NAW RAWH

~ John L. Pulamte

“I lungril po poin Lalpa chu ring la,
Nangma hrietnaa chun inngnat naw rawh.”
(Thubarhai 5:3)



Pathien hi ka ring ei tî zing lâi khawmin, mâni ringna le hriet thiemnaa khawm hin ei lo inngnat nasa hle a. Mihriem hisâpna a hlawsam ta chun, Pathien-a ringna ei inngnatna chen khawm hi a lo inhnîng pha thei a nih.

Kei a ziektu ngei el khawm hi, dam sâng khawsakna kawnga ka thil lo beisei êm êm le ka hisâpna chu a tâwp ti ti ang deu thawkhatin a hung um a. Mihriem ram taka chu lungngaiin ka’n dawm kûn pha ngâwi ngâwi a. Thlarâu ram taka khawm a mi sukchâu pha rawiin ka hriet a. Thû le hla ziek khawnga khawm nghâwng a nei naw thei naw a; ka pasietpui pha hiel bawk a nih. Chû kawnga chun, kei mihriem el hi tiemtuhai mi tawngtâipuina ka ngên a nih.

Mihriem hriet thiemna le hisâpna ringawta inngnat chu a det naw a, harsatna thlipuiin a nuoi tak tak phât a’n hnîng a, a la tlu se rup hlak. Chuong ang chun mihriem hriet thiemnaa innghattuhai chu sôm sâwt naw te chau a hung inlang a, a zuk bo nâwk el hlak ang hin, sâwt

a dai ngai nawh. Pathien-a inngnatuhai ruok chu beiseina a tâwp râwt huna le mihriem ngaituonain a phâk chin khêl tieng rama inthawkin, um lo inumtirtu le a um ta sa khawm sukbo theituin mak danglam takin a thilthawtheina chu a’n hmûtir ta hlak a nih.

Mihriem hisâpna le ngaituona ang hin thil hi fe tluong pei hlak sien la chu, mihriemin Pathien hre fu ta naw’m ei ni a, mâni theina sâwnin ei insuong ding a nî leiin, chu chu Pathienin a lo hmu lâwk kieu hlak leiin, mihriem thil tum tam tak hai hi a’n thlâwntir rawp hlak hrim a nih. Mihriema inthawka thil suok chun Pathien a châwimâwiin a sukropui ngai naw a, Pathien thilthawtheinaa inthawk chauin a ni lem. Chû leiin ei thil thawna kawng tam taka hai hin lo hlawsam hlak inla khawm,

exam result beisei ang ani naw chang khawm, Lalpa ah ei lawm thei anih. Ei lawmna hi ei hringnun anhoi lai chau ding annawh a, ei lawmna chu Pathien le a thutiem ei ring leia hung suok lem anih. **Pathien ah I lawm am le? Ieng ang tritnan I lungril a suk buoi am? Lalpa Thutiem a ieng tak am I chel tlat ding?**

Suolnain hmun insang lem changin I ngai hlak am? Pathien remruot hrietthiem theilo I nei am? I trawngtraina donlo ieng ieng am a um leh? Beisei taka Pathien donna nghaklai I nei? Lalpa thutlukna siem ah inngnat harsa iti tak iem?

Habakuk chun a lungril buoina tak hai Pathien kuomah an tluna, beisei takin a donna a ngahka, donna chu a beisei ang ninaw sienla khawm Pathien thuthlukna a chun an tuklut ani. Pathien remruot dan chu hre vawng thei nawmeini, amiruok chu Habakuk ang in Pathien ah ei chawl hadam thei ani. Pathien chu a tempul thienghlama a chenga, hnuoi le vana thunei tak ani. Suolin hmun insang lem changin in lang hlak sien khawm, ei Lalpa Pathien chun a tawp ah hnena a chang nawk pei ding anih. Pathien hmabulah in tuklut a, Ama ah lawm dinga lungril siem hi ei thaw ding tak ani.

13th April, 2023

(Mission Ripawt tiem zawmna ding)

rawngbawlina thra tak a la ni ei beisei a nih.

Delhi sunga Pathien thu ei hrlina hmun hai:

1.Maia Garden 2.Najafgarh 3.Chandar Vihar 4.Nangloi 5.Nilothri 6.JJ Colony 7.Vikas Nagar 8.Mohan Garden 9.Chanchal Park, 10.Badalli 11.Ranhola 12.Deep Enclave

Chun, zoom hmangin online-in tuk tin zing dar 6:15 A.M-in zing trongtrai nei a ni hlak a, Nilaini zan dar 7:00 P.M-hin ei pastor Lalsiesang Zote thruoina hnuaia Lalpan ringthar a mi pek hai ta ding puol bikin Baibul study nei a ni hlak. Zirtawpni zat hin bunghei trongtrai nei hlak a ni a, zing dar 9:30 A.M hin staff hai po kan trongtrai khawm a, bible study khom kan nei hlak. Chun, chawhnung dar 2:00 P.M hin kohran mipui kan rengin trongtraina kan nei hlak bok.

PATHIEN HI INPAK LE CHAWIMAWI TLAK A LO VA NI NGEI!

~Herbert Lalsanglur



Matthai 6:28 “...Ram lili par inthrang dan hi ngaituo ta u, sin an thaw naw a, pat an kher bok nawh.”

Office lamtluong ka hraw laia ngaituonaa hung inlang tawite hung suklang ka nuom. Nitin thawtranni anthawk zirtawpni sung office kai ding gin ka suok ve hlak a. Tukkhath chu office pan a motor kan tlan zing lai, motor tukver anthawk lampui sir a par chi tum tum mawi em ema par vul chuk el hai chu ka zuk thlier malam pei a. Ni dang naw ang takin an mawi hi ka ti zuol em em a. A en inhawi ka ti a, a hadam thlak ka ti em em bok. Pathien ropui zie le inpak tlak a ni zie nasa takin a min hriet thar tir a. Ka lawm em em.

Hieng lampui sir a par mawi em em hai ka thlir zing lai chun ngaituona ah thil ramtin a hung lut zui nghal a. Ka ngaituonaa hung inlang vang vang hmasa tak chu hieng parte chi hrang hrang hai hung insieng dan hi a nih. An hung insieng dan process hai popo hi ka lo va ngaituo set set ngai naw ngei de aw! Thil ni ding reng le thil um dan ding reng angin ka lo ngai hlak a lo ni hi tie! Hieng par mawi em em hai hi a chi (seed) kha hnuoiah a tla a (inso/tu), an hung mawng a, an hungin thranglien a, an hun bie ang pei in, inkhel der lovin, par mawi tak tak an hung insuo seng hlak ani a. A siemtu le enkoltu Pathien ropui zie le thilthawthei zie ka zuk hriet

suok thar leiin ka lawm em em.

Hieng par mawi em em hai enkoltu mihriem (gardener/mali) lem chu an um ngei a. Amiruokchu, insieng/ in mawng tir theitu, inthranglien tir theitu le par insuo tir theitu chu an lo ni der lem ie. Mihriem varna, remruot thiemna le felna ringawtin hieng par chi hrang hrang hai hi insieng/ in mawng tir, inthranglien tir le mawi em ema an hun bie senga par insuo tir theitu a lo ni naw zie dam ngaituonaa a hungin lang uor uor zing bok. A process hai popo hi mihriem hai thawthei ding ruol an lo ni lem ie. Pathien hi chu a lo va ropui ngei de aw! Hieng lampui sir a par, pakhat chau el khom ni lo, chi khat

chau el khom ni bok lo, chi hrang hrang hai, hmun hran hrana mi hai popo a zuk hriet kim vawng a, a zuk enkoltu vawng el ana. A chin le a lien, an hun bie sengah mawi em em in par ansuo tir tawl pei el ana. Eini mihriemhai, Ama ang pui ngeia ami siem, a chatuon ro hluopui dinga ami thlangsuok hai lem hi chu a mi va hriet fuk char char awm de aw ti a min hriet thar tir bawk. Ka lawm em em.

Ngaituona fe pei a chun hieng par chi hrang hrang hai hi iengga dinga a siem tawl kher am ning a ta aw ti zawna a hung lût ta pei a. Thil ho te a ka lo ngai hlak, amiruokchu umzie nei taka a lo siem tawl an lo ni meu el si a. A ropui zie, iengkim a iengkim, thil popo chunga thuneitu, inpak le chawimawi tlak Pathien a ni zie mihriem haiin ei hrietsuok le hmusuok theina ding a lo ni zing chu tie. Thing le par hai chen khawmin a ropui zie an lo puong suok ve pei chu a lo ni hi tie. A va ropui lawm lawm ngei de!

Ngaituona chu a fe pei a, hieng lamsira parte mawi tak tak hai hin a siemtu le enkoltu hi an hriet ve ding am aw ti zawna a hung lût zui ta pei a. A siemtu chu an va hang hriet awm naw ngei de maw. A siemtu le enkoltu khawm hre lo, thlarau nei khawm ni bok lo hai hman iengtiklai hunah khawm, khawlai hmuna mi khawn nisien a hriet fuk zing tawl a, an hun bie seng ah, inkhel der lovin, par mawi tak tak hai an suo tir pei el hlak ana. Ama ang puia a siem mihriem hai, ami siem tu hre let thei dinga lungril var neia ami siem hai lem hi chu a mi va hriet fûk in a mi va ngaisak nasa awm ngei de!

Ama hre lo fu ngai naw hlak inla khawm, Ama chun iengglai khawm ami theinghil ngai naw a, ami en kai zing hlak a, ami hriet lop lop zing hlak si a. Ei trul le ei mamaw hai chen khawm a hun takah ami pek zing pei bawk. Pathien hi inpak le chawimawi tlak hi chu a lo va ni ngei!!!

“Pathien hmangaituhai, Aman a ruot anga a kohai ta ding chun iengkimah an thratna dingin a thawpek hlak ti ei hriet.”

Rom 8:28